



鋒，猶思拒轍，遂復眩惑大臣，謀結朋（六）黨。有吐蕃僧乞奢彌尸毗磨羅等二人，知身聚沫，深契禪枝（七）爲法捐軀，何曾顧己，或頭燃熾火，或身解霜刀，曰：「吾不忍見朋（八）黨相結，毀謗禪法」，遂而死矣！又有吐蕃僧卅餘人，皆深悟真理，同詞而奏曰：「若禪法不行，吾等請盡脫袈裟，委命溝壑。」婆羅門等乃瞪目卷舌，破膽驚魂，顧影脩牆，懷慚戰股。既小乘轍亂，豈復能軍，看大義旗揚，猶然賈勇，至戊年正月十五日，大宣詔命曰：摩訶衍所開禪義，究暢經文，一無差錯，從今已後，任道俗依法脩習。小子非才，大師徐謂錫曰：公文墨者，其所問答，頗爲題目，兼制叙焉。因目爲頓悟大乘正理決。

問曰：令看心除習氣，出何經文？謹答：准佛頂經云：一根既反源，六根成解脫。據金剛經及諸大乘經皆云：離一切妄想習氣，則名諸佛。所以令看心，除一切心想妄想習氣。問：所言大乘經者，何名大乘義？答：楞伽經曰：緣有妄想，則見有大小乘，若無妄想，則離大小乘，無乘及乘者，無有乘建立，我說爲大乘。

第一問：或有人言，佛者無量多劫已來，無量功德，智聚圓備，然始成佛；獨離妄想，不得成佛。何以故？若只（離）妄想成佛者，亦不要說六波羅蜜，十二部經，只合說令滅妄想，既若不如是說，於理相違。答：一切衆生，緣無量劫已來，常不離得三毒煩惱，無始心想習氣妄想，所以流浪生死，不得解脫。准諸法無行經上卷云：若一切法中，除却其心緣相不可得故，是人名爲已得度者。又金剛三昧經云：佛言一念心動，五蔭俱生，令彼衆生，安坐心神，住金剛地，既無一念。此如如之理，具一切法，又金光明經第二云：一切煩惱，究竟滅盡。是故法如如，如如之智，攝一切佛法。又楞伽經第二云：但離心想妄想（九）則諸佛如來法身不思（議）智慧，自然顯現。又法身即頓現，示報身及以化身。又諸法無行經：佛告文殊師利，若有人問汝斷一切不善法，成就一切善法，名如來。汝云何答？文殊師利言：如佛坐於道場，頗見法有生滅不？佛言不也。世尊！若法不生不滅，是法可得說斷一切不善（法）成就一切善法不？佛言不也。世尊！

若法不生不滅，不斷一切不善法不成就一切善法，是何所見？何所斷？何所證？何所修？何所得？但離心想妄想，卽卅七道品，自然具足，一切功德，亦皆圓備，經文廣述，不可盡說，任自檢尋，當見經義據理。

問：所對於理不相違，若有衆生，離得三毒煩惱，無始心想，習氣妄想，便得解脫，亦得成佛，如是功德，不可比量。

又答：十二部經、准楞伽經云：佛所說經，皆有是義。大慧，諸修多羅，隨順一切衆生心說，而非真實在於言中。譬如陽炎，誑惑諸獸，令生水想，而實無水。衆經所說，亦復如是。隨諸愚夫，自所分別，令生歡善，非皆顯示聖智證處真實之法。大慧，應隨順義，莫著言說。又經云：佛言我某夜成道，某夜入涅槃，於此二中間，不說一字，不巳說，今說，當說。不說者是佛說。又涅槃經云：聞佛不說法者，是人具足多聞。又金剛經云：「乃至無有少法可得，是爲無上菩提。」又經云：「無法可說，是名說法。」據此道理，應不相違。

又問：有天人制於妄想，以制妄想故，生無想天，此等不至佛道，明知除想，不得成佛。

謹答：彼諸天人，有觀有趣，取無想定，因此妄想，而生彼天，若能離觀，離無想定，則無妄想，不生彼天。金剛經云：「離一切諸相，則名諸佛。」若言離妄想不成佛者，出何經文？准楞伽經云：無三乘者謂五種性，衆生中謂不定性者假說，不應如是執也。又答：所言五種性者，只緣衆生有五種妄想不同，所以說有五種名，若離得妄想，一種性亦無，何處有五耳？豈更立餘方便耶？

問：楞伽經云：所言與聲聞授記；化佛化聲聞授記，據此只是方便調伏衆生，數箇義中，涅槃道是三乘也。若離於想，大小之乘，無可言者，謂無想不？觀大小乘，非無大小；譬如聲聞，證涅槃後，大小之乘，更無所觀，此聲聞人，豈得言入大乘道不？

謹答：所言化佛與化聲聞授記者，聲聞人爲未見法身，及以

報身；唯見化身。所以化身授記，正合其理。

又問：准楞伽經云：「我所說者分別，爾焰識滅，名為涅槃；不言涅槃道，是三乘也。楞伽經偈：預流一乘果，不還阿羅漢。是等諸聖人，其心悉迷惑。我所立三乘，一乘及非乘，為愚夫少智，樂寂諸聖說，第一義法門，遠離於三趣，住於無境界。何建立三乘，諸禪及無量，無色三摩地，乃經滅受想，唯心不可得。」准斯經義理所說，三乘皆是方便導引眾生法門。又思益經云：「網明菩薩問思益梵天言，何為行一切行非行？梵天言：若人千萬億劫行道，於法性理不增不減，是故名行一切行非行。我念過去阿僧祇劫，逢無量阿僧祇諸佛如來，承事無空過者，並行苦行十二頭陀，入山學道，持戒精進，所聞智慧讀、誦、思惟。」問：是諸如來，亦不見受記，何以故？依止所行故。以是當知，若是菩薩出過一切諸行，則得授記。據此道理，法性理中，大乘之見，並是虛妄想，妄想，若離妄想，則無大小之見。又准楞伽密嚴經云：「聲聞雖離妄想煩惱，處於習氣痼譬如昏醉之人，酒醒然後覺，彼聲聞亦然，貪著寂滅樂，三昧樂所醉，乃至劫不覺。覺後當成佛。」聲聞貪著寂滅樂，所以不得入大乘。

又問：所言聲聞住無相，得入大乘否？答：准楞伽經云：「若住無相，不見於大乘」，所以不得取無相定。是故經文：「應無所住而生其心。」

第二問：離一切相名諸佛，是何經說？謹答：金剛經云：「離一切諸相，則名諸佛。」又大般若經，楞伽、華嚴等經中，亦具廣說。

又再新問：金剛經云：「若了達諸法，觀了然不觀者，是智慧。」若具備一切善已，然始無修，為化眾生，生大智自然成就，言先願力，故為凡夫妄想不生，凡夫本來不達一切，猶未具諸功德，雖滅妄想，不得成佛。以要言之，解一切法是智，修一切善法是福，為成就如是一切故，所以經歷多劫，因諸福智力故，三昧無觀，從此方顯。又首楞嚴三昧經云：「初習觀故，然得此三昧，譬如學射，初射竹籜，大如牛身；已後漸小，由如毛髮，並亦皆中。」從習於觀，是漸修行，諸佛所說，皆是漸門，不見

頓門。

答第二新問：准楞伽經云：「佛告大慧菩薩，應莫著文字，隨宜說法，我及諸佛，皆隨眾生煩惱解故，欲種種不同，而為開演，令知諸法自心所現。」又思益經云：「說法性理，若人千萬億劫行道，於法性理不增不減。」若了知此理，是名大智慧，於法性理中，修以不修，皆是妄想。據法性道理，若離妄想，大智本自然成就，若論福智，更無過法性道理，及以法性三昧，所言漸頓，皆為眾生心想，妄想見。是故經云：「大慧是故應離因緣所作和合想中，漸頓生見。」若離一切想妄想，漸頓不可得；若言離妄想不成佛者，出何經文所言？首楞嚴經云：「學射漸漸者，不緣增長心想妄想；只合令除妄想。」

舊問第三，問：言一切想者，其想云何？

答：想者，心念起動，及取外境，言一切者，下至地獄，上至諸佛已下。楞伽經云：「諸法無自性，皆是妄想心見。」

新問第三：上至諸佛，下至地獄之想，切要茲長，成就善法，遠離惡法，因此而行。若不識佛，不知地獄，如說十二因緣中無明凡夫中不合修行此法。

新問第三，答：一切眾生，緣無始已來妄想分別；取著妄想善惡法，或長善，或長惡。以是因緣，流浪生死，出離不得。所以經文，凡所有想（十）皆是虛妄，若見諸想非想，則見如來。若了知此一念功德，經無量劫修習善法不如此一念功德。又所言凡夫位中，不合學此法者，一切諸佛菩薩，無量劫所修習善法，成等正覺，皆留與後代末法眾生，教令修學，既言凡夫眾生不合學此法，是諸佛法教，留與阿誰？凡夫不合學此法，出何經文？

舊問：想有何過？答：想過者，能障眾生本來一切智，及三惡道久遠輪迴，故有此過。金剛經說，亦令離一切諸想，則名諸佛。

新問第四，問或有故令生長之想，或有不令生想，處凡夫地，初修行時，不得除一切想。答：諸大乘經云：「一切眾生，緣有妄想分別，取著生不生妄想，是故流浪生死；若能不取著生不生妄想，便得解脫。凡夫眾生，不得除想，出何經文？」

舊問：云何看心？答：返照心源看心，心想若動，有無淨不

淨、空、不空等，盡皆不思，不觀者亦不思，故淨名經中說：「不觀是菩提」。

新問第五，問：據十地經中：「八地菩薩，唯入不觀，佛令入修行。」據此事，凡夫初地猶未得，唯不觀如何可得？答：准楞伽經云：「八地菩薩，離一切觀及分別習氣，無量劫來，所受善惡業者，如乾闥婆城，如幻化等。了知菩薩者超過一切行，得無生法忍，然後得授記。不聞八地菩薩，教令修行，經文何如說，只合細尋諸經所說。凡夫未得初地，不合不觀者，此義合行不行，前問說訖。」

舊問：作何方便，除得妄想及以習氣？答：妄想起不覺，名生死；覺竟，不隨妄想作業，不取不住，念念即是解脫般若。寶積經云：「不得少法，名無上菩提。」

新問第六，問：如前所說，凡夫初學，豈得喻佛，佛是已成就者。答：凡夫雖不共佛，同諸佛所悟之法，准經文皆留與後代末法眾生，教令修學；若不如是，法教留與阿誰？又佛言無有少法可得者，不可執著言說，若無少法可得，無思無觀，利益一切者，可不是得否？答：此義前者已答了，今更重來，又再說者：佛從無量劫來，已離得不得心？亦無心無思，猶如明鏡。無心無思，離得不得，且隨眾生，應物現形，水喻寶喻，日月等喻，皆亦同等。又據入如來功德經云：非是不得少法，是得一切法，與義相違者。前問所言，凡夫不合學此法，所以攀大乘經文時，得如是無量無邊功德，何況信受修行，因此言故，答如此事。以無所得故，是名爲得，於理實不相違。

舊問：「六波羅蜜等及諸法門，要不要？」答：如世諦法、六波羅蜜等，爲方便顯勝義故，非是不要。如勝義離言說，六波羅蜜及諸法門，不可說言要與不要，諸經廣說。

新問第七，問：世間及第一義諦，是一是異。答：不一不異。云何不一？妄想未盡，已來見有世諦，云何不異？離一切妄想習氣時，一異不可分別。又問：此方便爲顯示第一義故，只爲鈍根（十一）者；爲復利鈍俱要？答：鈍根不了勝義者要；利根者不論要不要。又問：六波羅蜜等及餘法門，不言說要不要者，何爲不可說？答：爲法性理，即不可說。據法性理中，要不要，有

無，一異，俱不可得。又問：言經文廣說，如何說爲說言要不要不會。答：經文廣說者，鈍根說要；利根不論要不要，譬如病人要藥，求渡河人要船，無病之人不言要不要，渡河了，更不要船。

舊問：六波羅蜜等要時，如何修行？答：修行六波羅蜜者爲內爲外。內外有二種：內爲自渡，外爲利益眾生，所修行方便者。據般若經、楞伽、思益經：「修六波羅蜜時，於一切法，無思無觀，三業清淨，由如陽炎，於一切不取不住。」

新問第八，問：所言三業清淨時，六波羅蜜，凡夫未能行得，且修習不觀，中間不修行，待三業清淨，然後修習。爲復未能淨得三業，強修，如何修行？答：所言六波羅蜜有四種：一、世間波羅蜜，二、出世間波羅蜜，三、出世間上六波羅蜜，四、內六波羅蜜。准楞伽經云：廣說、畧說時，若得不觀不思時，六波羅蜜自然圓滿；未得不觀不思，中間事須行六波羅蜜，不希望果報。又問云：（十二）其野馬、陽炎，實是不會！答：野馬喻妄想心，陽炎喻一切世間一切法。譬如渴野馬，見陽炎是水，非實是水；若如是了達世間法時，即是三業清淨。舊問：修此法門，早晚得解脫？答：如楞伽及金剛經云：「離一切想則名諸佛」隨其根性利鈍，如是修習，妄想習氣亦歇，即得解脫。舊問：又行此法義，有何功德？無觀無想不功德，思及觀照，不可測量，佛所有功德，應如是見，且如此之少分。據般若經云：「假令一切眾生、天、人、聲聞、緣覺、盡證無上菩提，不如聞此般若波羅蜜義，敬信功德，等數所不能及。何以故？人天聲聞緣覺，及諸菩薩等，皆從般若波羅蜜出；人天及菩薩等，不能出得般若波羅蜜。又問：何名般若波羅蜜？所謂無想無取，無捨無著，是名般若波羅蜜。及入如來功德經，或有於三千大千世界微塵數佛所供養，承彼佛滅度後，又以七寶莊嚴其塔，高廣例如大千世界，又經無量劫供養之功德不及聞斯法義，生無疑心，而聽所獲福德，過彼無量百千倍數。又金剛經云：「若有人滿三千大千世界七寶，用已布施，及以恒河沙數身命布施，不如聞一四句偈，其福甚多，不可比喻。」大乘經中，廣說此義，其福德除佛無有知者。

新問第九，問：令一切眾生盡證無上菩提，猶不及此福者，

此無上菩提，乃成有上，此乃是否？次後說言無上菩提等，從般若波羅蜜出：無上菩提，不出般若波羅蜜；不出者說是阿耨箇菩薩。若說無上菩提，據如今現般若波羅蜜，似如此：只如此說者，不可是無上菩提。答：所言令一切眾生盡證無上菩提，猶（十三）不及此福者：前者所言，凡夫眾生，不合行此法，所以攀諸大乘經典，及般若波羅蜜。眾生聞此法生一念淨信者，得如是無量無邊功德。爲比量功德故作如是說。現有經文，說一切諸佛，及諸佛阿耨多羅三藐三菩提法，皆從此經出。今再問：有上、無上，及阿耨箇菩薩者，經文現在，請檢卽知。舊問：若離想不思不觀，云何得一切種智？答：若妄心不起，離一切妄想者，眞性本有，及一切種智，自然顯現。如華嚴及楞伽等經云：「如日出雲，濁水澄清；鏡得明淨，如銀離鑛等。」

新問第十，問：此言是實，乃是已成就具勢力者之法，非是凡夫之法者！答：此義前者已答了，今更再問，譬如蓮花出離淤泥，皎潔清淨，離諸塵垢，諸天貴人見之彌（十四）敬。阿賴耶識，亦復如是，出習氣泥，而得明潔，爲諸佛菩薩、天人所重。凡夫眾生，亦復如是，若得出離無量劫來，三毒、妄想，分別習氣淤泥，還得成就大力之勢；凡夫緣有三毒妄想蓋覆，所以不出得大勢之力。舊問：若不觀智，云何利益眾生？答：不思不觀，利益眾生者，入如來功德經中廣說：「由如日月，光照一切；如意寶珠，具出一切；大地能生一切。」又問：說執境、執識、執中論此三法中，今依何宗？答：此義是般若波羅蜜，無思大乘禪門，無思義中，何論有三，一亦不立。般若經中廣說。

新問第十一，問：此義是般若波羅蜜者，縱令是般若波羅蜜智慧可得，論禪不相當。佛由（十五）自於般若波羅蜜，分別作六種，共智慧各自別說？答：所行六波羅蜜者，爲求般若波羅蜜，若智慧波羅蜜具者：餘五波羅蜜修與不修亦得。又答言：所言禪不相似者：如寶積經中說：「善住意天子白文殊師利云，大士所言禪行比丘者，何等名爲禪行比丘耶？文殊師利言，天子！無有法可取是爲禪行。」又密嚴經中，「若有能修行如來，微妙定善，知蘊無我，諸見悉除滅。」思益經云：「於諸法無所住，是

名禪波羅蜜。」楞伽經云：「不生分別，不起外道涅槃之見，是則名爲禪波羅蜜。」及諸大乘經典，皆說如是。據此道理，末法眾生，教令修學，何以得知。諸大乘經云：「爲末法眾生，智慧狹劣，所以廣說，若有人聞此法者，卽功德不可量，何況信受奉行？」舊問：義既如此，何爲諸經廣說？答：如諸經所說，只說眾生妄想，若離妄想，更無法可說。所以楞伽經云：「一切諸經，只說眾生妄想，眞如在不言說之中。」又問：眾生本來有佛性者，何以得知本來有？如外道言有我，有何差別？答：本來有佛性者，如日出雲，濁水澄清，鏡磨明淨，如九十五外道者，以要言之，不知三界唯心所變。鑛中出銀，熱（十六）鐵却冷，先已說訖，不同外道有所言，有我等者見，有作者見，有時變者，或執有無，觀空住著於邊，以此不同楞伽經廣說。又問：何名爲眾生？答：眾生者，從具足妄想及五蔭、三毒，故有。又問：何名「二乘人」？答：二乘人者因見一切有，從因緣生：覺一切因緣和合所生者：無常、苦、空、厭於苦，故樂於涅槃，住於空寂。緣有取捨，故名二乘。偈言：「本無而有生，生已而復滅，因緣有非有，不住我教法。待有故成無，待無故成有，無既不可取，有且（亦）不可說。不了我無我；但着於語言，彼溺於二邊，自壞亦壞他。若能了此事，不毀大道師，是名爲正觀。若隨言取義，建立於諸法，以彼建立故，死墮地獄中。」

臣沙門摩訶衍言：臣聞人能弘道，非道弘人，賴大聖臨朝，闡揚正法，雖以三乘所化，令歸不二之門，爲迷愚蒼生，頻窮勝諦，臣之所說，無義可思，般若眞宗，難信難入，非大智能措意，豈小識造次堪聞。當佛啓教之秋，五百比丘起出。如來尙猶不制言，退亦甚佳。况臣老耆心風（十七），所說忘前失後，特蒙陛下福力加護，理性助宣，實冀廣及慈悲，絕斯爭論，卽諸天必皆歡喜，僧尼彼我自無。臣據問而演經，非是信口而虛說，頗依貝葉傳，直啟禪門。若尋文究源，還同說藥而求愈疾，是知居士，默語吉祥，稱揚心契，相應名何有。若須詰難，臣有上足學徒，且聰明利根，復後生可畏，伏望允臣所請，遣緇俗欽承。兼臣本習禪宗，謹錄如左進上。

（未完）